

Sakina Bintul Husayn (p)

Bevon ka mulk e Shaam mei jis dum guzar hua

(Poet: TBD)

Bevon ka mulk e Shaam mei jis dum guzar hua
Zaano pe jhuk ke sharm se uncha na sar hua
Furte haya se jism paseene mei tar hua
Har su hujoom dekh ke tukde jigar hua

Phir kar tamaam kucha o bazaar e Shaam mei
Saidaniyan pahunch gayi darbaar e aam mei

Baithe aseer e zulm andhere mei nange sar
Dar dar ke dekhti thi Sakina idhar udhar
The kis qadar thake hue Sajjad e khush seyar
Girte hi dasto paa ki na mutlaq rahi qabar

Jaage the raat bhar jo bohot sust hogae
Deewar pe bukhaar mei sar rakh ke sogae

Bano se dum ba dum ye Sakina ka tha bayaan
Kaisa makaan hai ke hawaa tak nahi jahaan
Dekhungi kis tarah se bhala shakle aasmaan
Hai hai zameen tak nazar aati nahi yahan

Amma sabon ki jaan khuda hi bachaaega
Shab ko bhi kya charagh jalaya na jaaega

Aisi hi teergi hai toh bas ho chuki hayaath
Mai jaanti hoon aaj ki shab ko shab e wafaath
Sote the leke scene pe baba tamaam raat
Aadath meri bigaad gae Shahe khush sifaath

Jab shamma gul hui hai toh ghabraa ke royi hoon
Amma bhala kabhi mai andhere mei soyi hoon

Maa beti mei yahan thi gham angeez dastaan
Aai beher ke bajne ki awaaz nagahaan
Hoshiyaar bhaaiyo ye pukaare nigaah baa(n)
Bhaage aseer toh na bachegi kisi ki jaan

Tadpe dil aur habs jo do chund hogaya
Zindaan ka dar lahad ki tarah band hogaya

Tadbeer e maa ne ki pae taskeen ajab ajab
Is raat ki tarah se bada dum ba dum ta'ab
Rone mei kat gayi jo Sakina ko nafse shab
Nachhaar hoke goadh mei leti who khush lakhab

Susti kamaal khaatere naazuk pe chaa gayi
Baatein jo maa ne ki toh zara neend aagayi

Soyi thi koi dum ke bandha aansuon ka taar
Dekha ye khaab aae hai sultaan e naam daar
Phelaae haath dhoondti uthi wo dil figaar
Jhuk jhuk ke dekhti thi har ek simt baar baar

Kehti thi hai gazab ka andhera ziyaa nahi
Baba kidhar kadhe ho mujhe soojta nahi

The sab haram yateem ki baton se nauha gar
Rote the paasbaan bhi muh dhaanp dhaanp kar
Nagaah gayi Yazeed ko is haal ki qabar
Machli hui hai dukhtar e sultan e behrobar

Faryaad kar rahi hai ajab izteraab hai
Baba ko dekhne ke liye bekharaar hai

Le jaao farq e Shah ye bola siyaah ruh
Lekar sar e Hussain rawana hue adu
Thi raah mei chamak sar e anwar ki chaar su
Zindaan ke paas jaake jo dee gesuon ne bu

Saidaaniyo mei hashr hua saf ulath gayi
Zindaan ke dar se aake Sakina lipat gayi

Khush khush khadi hui thi Sakina lagaae aas
Itne mei waa hua jo dar aai guloo(n) ki baas
Phaeli ziyaa e husn shahin shahe haq shinaas
Roshan hua makaan jo muddath se tha udaas

Daude haram Hussain ki tasleem ke liye
Sajjad uth khade hue taazeem ke liye

Baithi zameen pe leke Sakina sar e Imam
Muh rakh ke muh ke khoob kiye uns ke kalaam

Gash agaya ke laai qaza maut ka payaam
Lipti sar e pidar se khinchi jab rage(n) tamaam

Tha muh pe muh ke zeest ka naksha badal gaya
Hichki bas ek aai wahin dum nikal gaya

Banu ne jab zameen se uthaya sambhaal kar
Dekha ke iqteyaar mei hain dast o paa na sar
Gardan ko is taraf se jo thama jhukee udhar
Hae hae ye kya hai maa ne kaha thaam kar jigar

Kisko dikha ke fikre dawa o ghizaa karoon
Zindaan ka dar hai bandh sakina mein kya karoon

Kurta utha ke seene ko dene lagi hawaa
Zainab se ki ye arz ke padhiye koi dua
Sajjad se kaha ke idhar aao mai fida
Beta behen ki nabz toh dekho maraz hai kya

Chaunka rahe hain sab qabar e dasto paa nahi
Ghash mei kabhi ye haal kisi ka suna nahi

Dekhi jo nabz rone lage Abid e hazeen
Maa ne kaha tadap ke mujhe ta'ab ab nahi
Jo haal ho Khuda ke liye keh chuko kahin
Sajjad sar jhuka ke ye bole ke margayi

Takleef dijiye na tan e paash paash ko
Jaldi litaaiye ke aziyath hai laash ko

Sadqe gayi hua is andhere mei inteqaal
Beti ye daagh dil se na jaega maah o saal
Fizza ne paasbaano(n) se jaakar kiya sawaal
Dedo koi charaagh toh ehsaan hai kamaal

Ho roshni ye rasm hai saare jahaan mei
Mayyath padhi hui hai andhere makaan mei